



*Senin, 30 Agustus 2021*

**Ogen: Lukas 15:11-32**



**"Metenget Ersenina"**



**A**di erteman ras kerina jelma, banci si perdiateken karakterna, cocok entah lahang ras kita. Aadi la si akap cocok banci kita ndauh ras ia (jaga jarak) ertina la kita nggit ipengaruhina. Tapi uga adi teman si la si akap cocok e rehna bas jabunta nari?

Anak si nguda i bas oratenta enda ngelakoken kesalahen i bas keluargana erkiteken ipindona erta warisen si biakna kin jadi sikerajangenna. Saja ipaksakenna bana ope orang tuana mate. Arusna min warisen e ialokenna kenca lanai lit orang tuana. Kenca ipekeri-kerina duitna ndai, ngelabuh ia sabap lanai lit si engkelengsa. Si rate mekuah pe labo piga, teman si ndube rassa pe enggo nadingken ia. Lanai lit dalam puluh seakatan mulih kempak bapana. Iukurina, di kune pe lanai iakui bapana ia jadi anakna enggo me atena malem gelah ialokenna ia jadi budak i rumahna. Icubakenna mulih ku rumah bapana, kepe idauh-dauh nari enggo lalap ertima bapana nimai ia mulih. Tupung iidah bapana ilapna mis kal iayakina, kenca jumpa, idakepina, iemaina, jadi kal atena. Lenga pe anak ndai ngakuken kesalahenna, enggo leben bapa ndai ngalemi ia. Itamburina kesalahen anakna e alu ngalokensa mulihken ku jabuna, ngakui ia jadi anakna alu mereken tanda cincin, baju ras sepatu.

La kepe bali biak bapa ras biak abangna sintua. Nembeh ate abangna ngidah bapana ngalo-ngalo agina alu meriah ukur. Berjut ia janah la ia nggit ku rumah. La igejapna adi la ras bapa labo ngasup agina erbahan kai pe. Sikap la nggit ngalemi e situhuna biak mpeturah perubaten. Em si man alanken anak si nguda ndai. Di kune kita anak singuda e uga ngenda sikapta? Metenget ersenina, tuduhkenlah tetap biak ermeteruk ukur ras nggit ngaku salah. Ula nggit sirang ersenina, ndigan pe tetap ia seninanta.